

歸

田

集

848
814.8



3 0581 0182 9

歸田集

緒言

歸田集胡爲而作耶浪跡戎馬忽忽八載驅馳戰場區區十有餘年才疏學淺職小位卑耗民衆之膏脂未有寸補濫國家之名器毫無建樹戶仰素餐早應退避賢路請假解甲何必又災梨棗惟一飯之恩尙思報答况歷承拔擢豈容緘默矧八年之間攘外安內備嘗披星戴月之苦勦匪抗日常在沐風櫛雨之中言爲心聲詩以言志略抒數首以誌留別亦聊以表感激之忱依依之情耳乃承各級長官親族戚友咳玉吐珠紛紛賜和什襲珍藏形同湮歿茲值抗戰勝利憲法告成爰付奇劄以作紀念而以軍中雜詩附之尙乞大雅君子鑒而諒之存而覽之并賜指教幸甚

中華民國三十六年丁亥孟春月名煒周

達識於沐滄山房



歸田集

湖南
茶陵周

達名煒又
號楚農 初稿

余自民國二十三年甲戌服務陸軍第六十師追隨茂名陳將軍沛梁將軍仲江化縣董將軍煜文昌黃將軍保德德慶李將軍亦焯羅浮謝將軍日陽等前後八載馳驅陝甘川黔湘鄂豫蘇皖等十省丁丑抗日軍興奉調赴滬戊寅深入宜興轉戰贛北己卯戌守湖北之新牆河迄辛巳春始因背骨跌傷解甲歸田猥蒙家長官拔擢始充上尉書記繼升少校秘書改調少校副官旋升代中校副官主任八年之中全師袍澤共艱苦同死生情感融洽宛若家人長假既准言歸在即臨別依依不勝悵惘謹賦四章用誌留念乃蒙袍澤戚友紛紛賜和琳瑯珠璣增光行色高誼厚畀永銘肺腑愧余不學相形之下反見拙陋班門弄斧貽笑大方不無慚赧耳

留別四首

中華民國三十年辛巳春月於湖南湘陰縣芭蕉橋師部

幾年憂患飽同更輕甲一聯暗自驚敢炫遂初賦歸隱東臬幸得叱牛耕
文章事業逐時休願向山林著舊遊氣壯依然留故態煙波江上放扁舟

同寅協恭最堪思清夢猶常繞玉池

山名在湘陰縣東芭蕉橋之南

佇看諸公摧敵日捷書南駛望旌旗

報國孤忠矢寸心繫書候雁幸時臨每逢綠水青山地落月屋梁感慨深

袍澤戚友和詩

一

茂名陳 沛度侯

翊贊戎機歲月更平居寵辱漫無驚遂初佳句人傳誦暫此生涯樂釣耕
山水徜徉萬慮休放懷詩酒倍優遊祇今滄海橫流甚濟世應同破浪舟
袍澤情深倍繫思和章吟罷倚春池邇來勝利傳消息各路夷兵僕鼓旗
濂溪風月足愉心何日追蹤物外臨寄語東山高臥客蒼生霖雨望彌深

二

茂名梁仲江

青衫且把戰袍更直將當年豪氣驚自是南窗獨傲歲閒來遐想硯田耕
百戰歸來欲罷休林泉高臥五湖遊三顧草廬知有待東山在望悵同舟
數載戎幕去留思幻影重重欲履池解甲灌園吟風月韜光含曜挽揮旗
獻可替否感知心鴻雁遙賁戰地臨愧我總師賴君佐高山白雲意尤深

三

容縣羅奇

分襟又是歲華更往事追懷每自驚傲骨淵明歸去也田園居守學深耕
不爲五斗始歸休泉石膏肓著舊遊霜雪寒宵矢不夜興來欲泛子由舟
片箋片玉逞才思也試磨穿鐵硯池詞藻宣勦摧敵日請君拭目望旌旗
久別殊殷蟻慕心快同覲面雁書臨至今湘水潺湲逝猶帶離聲感慨深

四

化縣董煥載羣

飽嘗憂患歲幾更又賦驪歌最堪驚私願偕君歸隱去桑麻話罷便漁耕
昔年壯志至今休世路艱難欲倦遊未識桃源何處是石磯西畔問漁舟
賢才別去豈無思異地猶望共硯池領土淪亡家國恨征騎未憇事旌旗
南天烽火話傷心甘載馳驅老欲臨心繫故園歸未得

時粵東
已淪陷

舉頭空望白雲深

五

茶陵周名琳聖畏

農兄從軍八載久著賢勞近累家事遂堅去志茲請准長假歸有日矣爰步其留別原韻
和贈四絕以示感懷藉壯行色云爾時維中華民國三十年春節前二日弟名琳於湘北

將軍壩陸軍第三十七軍軍部

依然氣壯未曾更草檄已羸寇震驚報國齊家無二致何妨南畝暫躬耕

底事煩惱促告休雲山沘浦壯兄遊原知器小難容物大地風光好放舟

時梁仲江將軍已調升本軍副軍長繼任師長

爲化縣董載章將軍與兄意見不合乃亟求去軍長陳公度侯擬調軍部兄亦不肯

慷慨賦歸別有思燕然不愛愛蓮池消磨歲月憑詩卷嘯傲乾坤展酒旗

繫鈴又愧解鈴心

初余任六十師參謀主任師長係茂名陳度侯將軍兄於甲戌秋請纓來汴山余介紹任本師三六零團上尉書記至是求去軍長以兄秉性忠誠辦事精幹不許經余復再三要求始獲准

送別那堪外侮臨艱苦此中曾八載願兄逐日仍情深

堂弟聖畏余嫡堂叔福疇之季子也與余同年生小於余七月少同硯長同遊丁卯春赤

禍湖湘余方主辦新民高小聖畏乃投入軍校畢業後隨諸暨蔣銘三將軍歷任陸軍第

九師連排長參謀副官等職甲戌閩變平陳公度侯奉令長六十師調爲師部中校參謀

主任旋升上校抗日軍興以功升少將參謀長及度公升任三十七軍軍長復調爲軍部

參謀長旋奉令兼一八零旅旅長甲戌秋余因久苦匪禍憤而從戎訪弟於豫之盧氏縣

朱陽關并謁度公承介充三六零團上尉書記八年之間事余以兄必恭必敬余每因公

造訪弟必先至室外迎候其篤於手足之情於和詩尤可慨見卒因操勞過度致患肺癆
雖度公迭許入院休養而弟竟以久病曠職於壬午夏在湖南公醫院自殺以殉各級長
官袍澤戚友同聲哀悼痛失良才此不特余家德薄之不幸亦國家之損失也至今思之
猶有餘痛略誌數語以示不忘爾丁亥春名煒識

六

茶陵何愚子齡

最是傷心歲序更絲絲白髮使余驚未還初服得歸隱共步東皋羨耦耕
生涯壓線幾時休好是洮江是舊遊綠滿園林春已老夕陽樓畔看漁舟
故人遠戍耐人思欲寫離懷借墨池海角天涯同悵望不知何日返旌旗
一樽竹葉共談心咫尺洮江幸辱臨故國烽烟今已熄毋懷競競冰淵深

七

茶陵月琴老人

驪歌唱別情難更庚辰冬至前曾假歸未數日即返部郵報家人更受驚寄回家書云在長沙留守處跌傷背骨已呈請長假俟批准後即歸回到營中曾幾

日緣何解甲賦歸耕

東征撻伐幾揚休莫效儀秦列國遊抗日寅僚堅到底汝當共濟矢同舟

孤忠報國令人思，怎奈棲遲泌水池。不把海東專制掃，漫誇歸唱國旗旗。
投筆長懷定遠心，猛思國難當頭臨。狂瀾既倒匪難挽，未作中流砥柱深。

月琴老人余之嫡堂叔福林也，年逾古稀，精神矍鑠。少年遊泮，老不釋卷，和詩獎掖，激勸其愛護子姪之情，溢於言表。愧余不克遵命，有負厚望，不無遺恨。謹識數語，以誌余之不肖云爾。丙戌秋，名煒識。

八

八

茶陵周揚美夢菴

懷歸未是壯心更，遍地胡塵烽火驚。欲待知音方爲用，有幸樂道且躬耕。
歸田解甲許休休，報國原非悔浪遊。八載馳驅羸汗馬，大江東去歌同舟。
馬前草檄逞才思，何用磨穿鐵硯池。試看當年摧敵寇，文章終不讓旌旗。
薄宦淹留漫愜心，羽書南國休重臨。白雲滿榻惟高臥，邱壑胸中自淺深。

堂姪揚美字夢庵，一字晚村，秉性溫厚，沉默寡言，博覽羣書，尤專醫學，詩文詞賦莫不精研。惜家貧未克深造，其父名德豪俠，好義有烈士風。先父兩遭匪擄，堂兄均捨身營救。庚午之亂，以不見容於赤匪，竟以身殉。余不肖不克闡揚潛德，敬附數語，以表吾兄之忠義。

於萬一云爾丙戌冬名煒識

送楚農大兄歸茶陵

江蘇張翥乃軒

綠樹陰陰白鳥飛
水田秧高靜朝暉
啣泥馱馱愁應絕
點水蜻蜓力更微
北望洞庭誰奉使
西迎夔府一霑衣
共來楚國尋騷旨
盈掬蘭花願已非

右和詩八章贈詩一章擇尤披錄餘多未及備載丙戌冬月名煒附記

附錄軍中雜詩

余素不能詩間有一二隨占偶成聲韻音律未合也甲戌從戎轉戰南北興之所至略有吟咏不工更甚然詩以言志其合格與否又當別論故不揣拙陋附錄於後以作紀念閱者勿以詩視可也丙戌冬名燁識

乙亥二月隨軍剿赤由隴入蜀道經摩天嶺

部伍遠征入蜀來高峯接漢信崔嵬懸崖絕壁山谿險鳥道羊腸路紆回北望秦隴如指掌南瞻川筑似屏臺當年伯約恃無恐詎料陰平鄧艾開

三十感懷

乙亥四月軍次四川江油

從戎倏忽近周年馬齒徒增悵依然愧無寸進報親友努力奮勉着先鞭

和黃副官鐵夫原韻

乙亥秋軍次甘肅西固縣

蜩蟬國事倍傷心禾黍離離漫行吟大好河山顏色改何時收復淚潸潸
奔馳戎馬已經年跋涉山川幾萬千何日凌霄得遂志掃平四海凱歌旋

光陰駛去似流波歲不我與空蹉跎八十梁灝始及第我如梁灝少年多
彌漫赤氛六七年可憐百姓受熬煎元戎幸有親征駕河海澄清在眼前
戎馬倉皇春復秋頻催征鼓幾時休萬里鵬程期相勉慷慨擊楫障東流
關東早陷平津危志切請纓征鼓催拔劍叱咤平三島東瀛痛飲馬方歸
僕僕征途國事忙白山黑水空相望早平赤寇禦夷狄一馬爭先到瀋陽
隨軍遠道入西來玉露紛紛忽滿階報國愧無功尺寸徒添馬齒令人哀
戎幕傳刁斗鷄鳴亂數籌涼風吹虎帳月影映銀鈎有懷酬壯志無心看牽牛起舞幕前哲
酌酒嘆金甌

黃君鐵夫字名揚江西南康人二十四年秋駐軍甘肅西固縣聞倭寇平
津賦詩感慨徵余索和茲錄其原作於後

劇憐往事總驚心戎馬倉皇試聳吟滿目瘡痍嗟未復肉生髀裏淚泔泔
離鄉轉瞬已三年淚灑秋風遍大千邁老嚴慈喜健在澄清攬轡錦衣旋
念六韶華等逝波風塵覆落嘆蹉跎學書學劍均無就長缺依人感慨多

虛度韶華念六年，惹人譏評受熬煎。平生豈乏凌雲志，祇奈窮途馬不前。
風塵僕僕幾經秋，戎馬關山亂未休。拙句偶成雞甫唱，同心協力挽狂流。
遼陽烽急國阨危，路側屏營馬上催。誓擲頭顱殲木屐，嬌嬌莫問幾時歸。
十年戎馬苦奔忙，三箭天山側目望。故國河山今昔感，幾回征夢入遼陽。
澎湃秋風夜夜來，梧桐落葉滿庭階。終朝難寐心思亂，窗外蟲聲唧唧哀。
竟夕難成寐，更敲第幾籌。寒風吹砭骨，明月照懸鉤。捲簾來螢火，開窗看斗牛。
思家歸未得，聊酌酒一甌。

乙亥冬軍次四川綿陽舟行至重慶晨起大霧偶占

曉光未啓睡方濃，彌漫天空霧重重。露透征衣錦被濕，風吹冷面亂鬢蓬。
仰望明月渾無影，俯視流泉不見蹤。太息年華輸夢裏，半生潦倒任西東。

和張營長原韻

丙子夏軍次貴州省垣

萬里長征展壯圖，胸中韜略擬孫吳。軍容荼火常齊整，豪邁風流此後無。
弱冠早已作高官，繞膝萱堂羨承歡。富貴浮雲身外物，好留佳句與人看。

神州淪陷已多年奇恥未雪共戴天願君努力報黨國關東早復舊山川

張君靖字化戈江西永豐人少年風流慷慨揮霍與團長梁公不合求去臨行贈詩索和殊可惜也丙戌冬名燁識原詩略

代三五五團周團長成欽祝九三師鄧副師長之封翁夫婦七旬雙壽及

其子完婚詩

丙子秋軍次貴州省垣

聰明穎悟異尋常好義輕財譽滿鄉福備箕箒欽賜嘏德齊梁孟久垂芳庭前玉樹六枝秀池上金桃千載香佇看文孫能濟美螽斯衍慶壽而康

日寇又進擾察哈爾閱報偶感

丙子冬軍次皖南寧國

塞北起烽火倭奴東向來寄言肉食者莫把榆關開是時遼東已失故云

和美姪二十感懷原韻

丙子冬軍次陝西大荔

優遊林下幾經秋身世浮雲事靜修理亂怕聞明淡泊英才喜育略報酬歡承菽水娛親意安處衡門樂道求藏器待時希奮勉萬里鵬程志勿休

丙子冬堂姪揚美三十初度分詩索和余以不能謝之隨占八句未敢發

也其原詩云

原詩二首茲錄其一

歲月蹉跎三十秋依然窮巷事潛修
名士籍貧原好寄食侯門願豈酬
欲報親恩惟奉養羞隨世態尙營求
年來無限悽愴感濁酒頻澆迄未休

丁丑元旦感懷

軍次陝西渭南縣下邽鎮

駒逝韶華似去波年年事業空蹉跎
悍將膽敢叛元首撻伐用張感慨多

詹書記誠字達三浙江諸暨人和云

婆娑年華逝碧波過眼黃花慨自跼
風霜萬里何所事夜來寒枕苦味多

史副官可讀字依儂湖北天門人和云

滄桑世變逐浪波半生事業嘆蹉跎
屈身黨國艱難甚虛度年華感亦多

丁丑夏駐軍武昌端節日登黃鶴樓有感

北討南征未曾休軍書暇日且登樓
劍蒲黍逢佳節青雀黃龍競渡舟
遍地兵戎風鶴唳漫天戰火草木愁
精忠報國爲天職翹首燕雲恨悠悠

張楊叛國幸已平忽傳湘沅苗亂驚
揮戈陷下經鄂渚旌旗西指道楚荆
長江浪闊競渡好

黃鶴樓高極目橫縱馬遼東除僞滿河山永固喜盈盈

丁丑秋抗日軍興本師駐防湘西奉調赴滬待輪漢口中秋日全團會餐
有感

何事蘆溝起釁端侵我國土肆兇殘傳來警報皆欲裂寄到軍書髮冲冠極目淞滬頻擦掌
待舟漢皋且聚餐厲兵秣馬向東去殲盡倭奴舉世安
萬衆激昂似怒潮誓平三島氣凌霄憑將血肉衛華夏好把倭皮作絳綃九世讎仇今始雪
頻年憤慨自此消東瀛直搗恨方釋白日青天海外飄

代旅長梁仲江將軍和宜興儲縣長詩

戊寅春奉令深入敵後破壞京滬鐵路軍至宜興爲敵所阻該縣縣長儲南強贈詩旅長
奉命代和原詩韻錯從略丁亥春名煒識

策馬棠疆欽令名撫髀興嗟愧治兵蒿目河山顏色改誓平三島飲東瀛

戊寅冬先嚴慈安厝余適軍次湘陰乃假歸奔喪在家十日奉召返部
承諸弟姪遠送書此誌謝

天涯地角效驅馳險阻艱難祇自知聚首寒窗方敘樂驚心征鼓又催離多情感爾壯行色
無能依人故去遲寄語大家各珍重平安兩字共相期

林叔和云

假滿奔喪復遠馳盡忠報國孝相知新年握手唱驪別故國傷心咏黍離無故遭逢莫道
早有緣會合不論遲功名誰謂非前定時勢英雄勿失期

和稷弟送返岳陽軍次原韻

投筆慕封侯艱苦豈罷休闊別近五載聚談恰一周暢敘天倫樂關懷國事愁大平歸來日
把酒棹輕舟

聞道征鼓急離家復遠行殘骸遍原野劫火滿江城有意懷侵略無端興甲兵那怕風波險
班馬爭先鳴

再疊前韻

樗櫟敢希侯報國志未休猖狂懷阮藉潦倒似馬周滿天風雲急匝地草木愁慷慨渡江楫
破浪一孤舟

回家纔十日黯然又離行漫吟陽關道狂歌古巴城奮志研經史勉力事甲兵分鑣揚祖澤
佇看驚世鳴

再疊前韻奉呈堂叔福林

教子覓封侯邁老志未休訓誨擬漢馬文章齊宋周却病須尋樂延年務去愁期頤稱觴日
客來共泛舟

從戎忽五載纔歸又遠行鼓聲振衡嶽波浪撲巴城亂世思勇士救國賴奇兵雲夢指日復
旋歌唱凱鳴

附稷弟來詩

堂弟名輝字籀漢又字祖稷三叔之子也性好考古於周秦以上金石文及甲骨文頗具
嗜癩癖戊寅冬余返岳陽軍次承贈以詩道勁老練余愧弗及其篤於手足之情可見一
班已名煒附識

我志眇王侯攻書苦未休甘陳終振漢方召竟興周別路無窮恨離亭又增愁洞庭波正
惡掛席穩行舟

急難須兄弟何堪送遠行豺狼交塞道鷹隼散盈城故國傷苗黍新年事甲兵容修孔孟
學午夜數雞鳴

堂叔福林和云

投筆未封侯男兒詎肯休假歸十日滿難挽兩星周八百湖波闊三千旅客愁洞庭誰共
渡相濟矢同舟

國難方殷日離家又遠行親骸歸淨土婦淚灑愁城甲棄多逃卒丁抽急派兵征途風雨
晦詎忍聽雞鳴

堂姪揚美和云

漫說封王侯回頭萬事休利名原是幻富貴豈能周攤卷非希聖舉杯爲遣愁浮生應有
幾流水送扁舟

華夏淪夷狄豺狼忍肆行匡時誠砥柱救國賴干城黎庶深水火胸懷蓄甲兵澄清抒壯
志舞劍聽雞鳴

和稷弟元旦懷伯兄原韻己卯春軍次岳陽

樂道紹前光抱膝擬南陽專心研國學努力圖救亡著述嫌歲短馳驅覺夜長願共宏先緒
憑詩祝健康

附稷弟原詩

鞍馬度年光風塵冷夕陽黃天殊未喪赤日運將亡語笑驚辰促愁思積歲長把酒憑相
問河山祝壽康

己卯春日感懷呈仲江芝峯二公

軍次湘北

濫竽數載歲悠悠虛度韶華三五秋投筆有懷期報國枕戈乏術覓封侯屈身記室無窮恨
埋首案牘幾時休何日得遂凌霄志鵬飛萬里任遨遊

閒步中庭獨徘徊牡丹雖好蕊未開寄語東風須借力扶持灌溉賴栽培
有美一人兮宛在水中央思欲登彼岸道路阻且長含淚顰不語悽愴復徬徨願借慈航渡
得上君子堂怡然調琴瑟素手理衣裳情意相投合終生以徜徉

師長陳度侯將軍榮升三十七軍軍長呈賀

己卯秋軍次湘北

聞道風雲急倭夷興甲兵將軍懷遠略壯士逞豪英蘇皖留勝蹟贛湘馳令名論功應行賞

萬衆慶干城

旅長梁仲江將軍榮升六十師師長呈賀

己卯軍次湘北

將軍粵之茂名人性豪爽俠直好義尤重情感甲戌冬余因久苦赤禍投筆從戎時將軍任三六零團團長蒙委充團部中尉副官旋調升上尉書記丁丑抗戰軍興轉戰淞滬將軍以殊勳晉升少將團長無錫東亭及學士橋兩役以疲困之卒轉危爲安厥功尤偉是年冬晉升一七八旅旅長余隨至旅部戊寅冬升副師長師茲以長陳度侯將軍升任三十七軍軍長而以將軍升任六十師師長國難方殷倚畀之隆可以想見余蒙將軍拔擢調升師部少校祕書未一月改調少校副官又未一月調代副官主任八載追隨未嘗一日離也且隨將軍者多矣然始終相依言聽計從則惟余一人而已於其榮升之日占句

呈賀亦聊以表知遇之隆感激之深愛戴之誠耳

丁亥春名燁識

鷹揚玉塞起風雲胸蓄鈴韜建奇勳欲挽狂瀾憑巨掌中流砥柱賴將軍
曠代戎豪誰與儔擎天柱石別開眸貔貅功著高方岳氣節嶙峋冠九洲
參贊戎幕近八年同心攻錯幾精研苦戰功高應上賞患難相隨喜懋遷

鐵血馳騁古戰場捷報頻傳姓字香
經綸大展知有日佇看勳猷萬古揚

和林叔送余返部首途告別原韻

庚辰冬軍次湘北

河山破碎國多難久戰心堅寇勢殘
櫛雨沐風途僕僕披星戴月路漫漫
匹夫有責敢辭苦敵愾同仇不計寒
待到東瀛痛飲傳來捷報共騰歡

附林叔原詩

歸家容易別家難宮綫雖添歲又殘
兒女牽連情戀戀關山阻隔路漫漫
鷄鳴雨透征衣濕鶴淚風淒旅帳寒
借問一聲何日返竹林叢集一堂歡

梁仲江將軍抗戰紀事

五古六十韻切六十師

島夷懷侵略強暴欲兼并小醜不量力
跳梁肆兇橫伊藤與大隈田中發狂言
蘆溝釁端啓淞滬亂方萌統帥赫然怒
撻伐聯盟寸土誓必復領袖誥庶氓
最後關頭到忍痛作犧牲軍書傳羽檄
湘鄂急調兵衛國乃天職萬衆咸請纓
漢皋聚餐日中秋月正明諄諄致訓誨
激昂矢忠貞三軍齊踴躍敵愾具同情
整裝翌晨發鼓棹向東行羅嘉初試軻
安亭逞豪英學士橋之役反敗轉爲贏
頑寇憑猛撲狼奔犯南京奉命駛援救
詎論雨和晴間道競奔走

晝夜那分程積功升少將指揮望旗旌整訓未匝月深入宜興城敵後交通破和橋展鬥爭
溧陽與戴埠勞逸勢已呈衆寡復懸殊四面皆夷聲退守金雞嶺養銳更蓄精反攻時機熟
鏖戰怒目瞪自身先士卒上下感至誠黎明至薄暮鼓角愈爭鳴殘骸遍山谷羶腥滿蔓菁
全師凱旋日壺漿夾道迎馬當扼要塞咽喉湖與彭艦艇沿江上航機似流鶯擲彈如雨落
砲擊若雷轟疾馳圖收復錯過淚徒傾幸遇東流野殲敵幾盈坑贛北方吃緊驅馬又長征
麒麟峯最險肉搏持短槩楊何奮忠勇義盡仁亦成同寅慌失措越俎賴獨擎煤山施奇計
寇還無一生瑞武資保障無敵顯威名洞庭波浪惡乘勝鎮楚荆臨湘鐵路毀啣枚減裝輕
聲威播絕域聞風未敢撓汨羅新牆傍倭屍盡封鯨三次湘大捷舉世皆震驚功懋膺上賞
擢調任師卿運籌韜略廣久戍力愈勛紀律尤嚴肅民歌細柳營納粹末日到國際出權衡
開羅波茨坦憲章締精闕原子示懲創廣島一朝平五強共合作連轡入東瀛介推不言祿
解甲賦歸耕功成身先退明哲氣恢宏勳猷彪史冊千古有殊榮外患從茲去海晏河且清
革命完大業五族喜盈盈我參將軍幕交誼弟與兄患難相與共寒暑曾八更俚句紀史末
留與後人評

右詩係中華民國三十五年勝利週年紀念日補作名煒自識

領袖蔣公六旬壽誕誌慶

丙戌冬月慶祝元首誕辰口作

聖哲天生孰與侔唐宗漢武讓君優
讎復九世降三島譽稱五強震兩球
壽慶南山咸頌祝華光北斗盡歌謳
完成憲法倡民主萬衆同心戴冕旒

神聖文武超等倫內安外攘政依仁
六千歷史憑公續四兆黎民頌壽身
蕩蕩巍巍如堯大煦煦皎皎似陽春
河山收復勳猷炳舜禹以來第一人

歸

田

集

編後感言

余自辛巳假歸蟄居衡門除唸佛外間以提倡公益建設鄉村爲己任優遊林泉耕讀自娛早已置名利二字於度外不料甲申之夏敵寇竄擾茶陵淪陷風聲鶴唳不遑甯處幸賴領袖神聖文武終得最後勝利讎復九世位列五強歡欣之餘痛定思痛乃將軍中俚句憑記憶所及附錄數章其不及記憶者略焉非敢言詩聊以表吾民之憤恨誌日寇之殘暴揚中華之威德供異日之參考耳

中華民國三十六年一月憲法公佈日楚農周名煒自識

772229